

ROYAL ARCTIC LINE A/S

CVR NR. 16 54 55 38

§ 1

1.1. Suleriaasissap tunngavia

Suleriaasissaq manna pilersinneqarpoq Ingerlatsiviit pillugit inatsimmi § 130 aamma ileqqoreqqusani § 9, imm. 1 tunngavigalugit.

1.2. Pappiaqqap originalia tamatigoruinnaq ingerlatsiviup siulersuisuisa allattaavissuini inissisimasassaaq.

§ 2

2.1 Siulersuisut inissitsiternerat

Ukiut tamaasa ataatsimeersuareernerup imaluunniit immikkut ittumik ataatsimeersuareernerup kingornatigut, tassani siulersuisunut ilaasortamik nutaamik toqqaasoqarsimatillugu, siulersuisut inissitsiterniarlutik katersuuttassapput.

2.2. Inissitsiterluni ataatsimiinnermi ukiumut ataatsimut atuuttussatut siulittaasup tullia qinerneqartassaaq, tak. ileqqoreqqusani § 8.6.

2.3 Suleriaasissap akuersaarneqarnera

Siulersuisuni ilaasortanngortoq aamma sinniisussat nutaat suleriaasissap originaliani atsiortinneqassapput.

2.4 Siulersuisuni ilaasortanngortumut suliffeqarfik pillugu paasissutissat pisariaqartut tamarmik tunniunneqassapput, tamatumunnga ilanngullugit ileqqoreqqusat, suleriaasissat, ukiuni qaangiuttuni kingullerni pingasuni ukiumoortumik nalunaarusiat, ukiumi ingerlasumi siulersuisut ataatsimiinnerinit imaqarniliat il.il..

§ 3

3.1 Ataatsimiittarnerit

Siulersuisut ataatsimiittarput tamanna siulittaasup pisariaqartutut nalilerpagu, imaluunniit tamanna siulersuisuni ilaasortamik piumasarineqarpat imaluunniit pisortaqatigiit siulittaasumut taamaattoqarnissaanik piumasaqarlutik saqqummiussippata.

Siulersuisuni ilaasortaq kinaluunniit imaluunniit pisortaqatigiit piumasaqaateqarsinnaapput siunnersuummik imaluunniit sammisassanik ullormut oqaluuserisassanut ilanngutsitsinissaminut.

3.2 Ataatsimiinnerit amerlassusiat

Ukiup ataatsip ingerlanerani ikinnerpaamik sisamariarluni ataatsimiittoqartassaaq, taakkuninga ataaseq tassaassaaq naatsorsuutit pillugit ataatsimiinneq, tak. matuma kinguliani imm. 11.1 sinneri siulittaasup aalajangersaanera tunngavigalugu.

Siulittaasoq ukiumut ataasiarluni ataatsimiittarnissanut aamma sulissanut pilersarusiussaaq, tamanna saqqummiunneqassaaq siulersuisut siullermik ataatsimiinneranni tassa inissitsiterluni ataatsimeereernerup kingorna.

3.3 Ilimasaarineq

Siulittaasoq siulersuisut ataatsimiinnissaannut ataatsimiigiaqqusititsisassaaq sapinggisamik sivikinnerpaamik ullunik 14-inik sioqqutsisumik ilimasaarinikkut. Ataatsimiigiaqqusinermut ilanngullugu siulersuisunut ataatsimiinnissami ullormut oqaluuserisassat nassiunneqassapput – pisariaqassusialu tunngavigalugu imaluunniit tamanna pisinnaappat – naatsorsuutitut tunngasut aamma oqaluuserisassanut ilanngussat.

3.4 Sumiiffissaq

Siulersuisut ataatsimiinnerat Kalaallit Nunaanni imaluunniit Danmarkimi ingerlanneqassaaq. Immikkut pisoqartillugu ataatsimiinneq allami ingerlanneqarsinnaavoq, ataatsimiinnermi sammisassaq imaluunniit pissutsit allat siulittaasup isumaa tunngavigalugu tamanna tunngavilersorluarneqarsinnaappat.

3.5 Ataatsimiinnerup avataani aalajangersaanerit

Immikkorluinnaq pisoqartillugu, siulittaasup isumaa tunngavigalugu siulersuisut ataatsimiinnissaat utaqqineqarsinnaangippat, taava siulersuisut aalajangersaasinnaapput allakkatigut, elektroniskiusumik imaluunniit oqarasuaatikkut siulersuisut akornanni taasisoqartitsinikkut, tak. tamakkiisumik §§ 4 aamma 5.

Siulersuisuni ilaasortat tamarmik isumaqatigiissutigippassuk, taava siulittaasup kissaateqarnera tunngavigalugu allakkatigut ingerlaartumik aalajangersaasoqarsinnaavoq. Tamatumunnga atorneqartut, tassa taamaattoqarsimappat aalajangersaanissamut tunngavissatut ingerlaartinneqarsimasut, ataatsimiinnerni allattaavissuarni ilanngussatut ilanngunneqassapput.

3.6 Siulersuisut ataatsimiinnerini ullormut oqaluuserisassat

1. Siulittaasoq allatut aalajangersaanngippat siulersuisut ileqquusumik ataatsimiinnerini tamani minnerpaamik ullormut oqaluuserisassanut ilaatinneqartussat tassaapput:
2. Ataatsimiinnermi kingullermi allattaavissuarnut allanneqarsimasunik imaqarniliamik atsiuineq.
3. Siulersuisut siusinnerusukkut aalajangersarsimasaannit malinnaaffiginninneq
4. Kukkunersuisut oqaaseqaataannik saqqummiussineq misissugassatut aamma atsiugassatut.
5. Siulersuisut ataatsimiititaliaannit nutaarsiassat, tamatumunnga ilanngullugit kukkunersiuinermut ataatsimiititaliaq, toqqaasussanik aamma akissarsiarititat pillugit ataatsimiititaliaq aamma compliance pillugu ataatsimiititaliaq.
6. Siulersuisut siulittaasuannit nalunaarutit.
7. Pisortaqatigiinnit nalunaarutit, tamatumunnga ilanngullugit siulersuisut kingullermik ileqquusumik ataatsimiinnerisa ingerlatsiviup ingerlatsinera pillugu nalunaarut, aammattaaq pissutsinut pingaaruteqartunut tunngatillugu ilisimatitsineq, taakkununnga ilaassapput pisortaqatigiit suliniutinut nutaanut aamma /imaluunniit aningaasaliissutissanut nutaanut siunnersuutaat. Qaammatikkuutaartumik nalunaarusiat saqqummiunneqarnerat ilanngullugit missingersuutinik malinnaaffiginninneq.

8. Tamalaat.

3.7 Ilanngutassat piffissami aalajangersimasuni ullormut oqaluuserisassanut ilanngunneqartussat

Ullormut oqaluuserisassat § 3.7-imi allattorneqarsimasut saniatigut matuma kinguliani immikkoortut allattorneqarsimasut ukiup ingerlanerani ilanngunneqartassapput.

- a. Ukiumoortumik nalunaarusiap aamma ukiumoortumik naatsorsuutit pillugit nalunaarusiap oqaluuserineqarnera.
- b. Ukiumut ataasiartumik ukiumut tulliuttumut missingersuutit akuersissutigineqartassapput.
- c. Ukiup affaanut nalunaarusiaq siulersuisunut akuersissutigisassanngorlugu saqqummiunneqartassaaq.
- d. Ukiup affaanut nalunaarusiap saqqummiunneqarneranut atatillugu ukiup affaata aappaanut missingersuutit (missingiutit) kukkunersiorneqarsimasut saqqummiunneqassapput.
- e. Ikinnerpaamik ukiumut ataasiartumik nalilerneqartassapput ingerlatsiviup aaqqissuussaanera, tamatumunnga ilanngullugit ingammik ingerlatsiviup naatsorsuutininik allattuiffia aamma naatsorsuuseriffia, missingersuusiortarnera aamma suliffeqarfimmi namminerminni misissuisarneq aamma qarasaasiaqarnikkut aaqqissuussinerup aarlerinangitsuunerat, aammattaaq misissuisarnerminni ileqqut suut aalajangersarneqarsimanersut atornerluisoqarsinnaanera sillimaffiginiarlugu.
- f. Ukiumut ataasiartumik ingerlatsiviup sillimaserneqarneranut tunngasut oqaluuserineqartassapput, tamatumunnga ilanngullugit sillimasiinermi matussusiissutissat pigineqarnerisut, tassa siulersuisut sillimasiinissamat politikkimut akuersimasaannut tamanna naleqquttuunersoq. Tamatumunnga atatillugu siulersuisut nalilissavaat, pisortasut akisussaassuseqarnermut sillimaserneqarnerat eqqortuunersoq aamma matussusiissutissaq naammannersoq.
- g. Ingerlatsiviup inuiaqatigiinnut akisussaaqataaneranumut politikkiata oqaluuserineqarnera aamma tamatuma ukiumoortumik nalilersorneqarnera.

- h. Ingerlatsiviup attaveqaqatigiittarnermut pilersaarutaata oqaluuserineqarnera aamma tamatuma ukiumoortumik nalilersorneqarnera.
- i. Aningaasarsiornikkut aammattaaq niuernermit tunngatillugu nalorninartunik aqutsinerup oqaluuserineqarnera aamma tamatuma ukiumoortumik nalilersorneqarnera.
- j. Ingerlatsiviup CSR-imut tunngatillugu politikkiata aamma suliaqarnerata oqaluuserineqarnera.
- k. Suleriaasissap oqaluuserineqarnera pisariaqarpallu nutarternera.
- l. Siulersuisut aamma pisortaqatigiit nalilersorneqarnissaannik iluuseqarneq tamatumunnga ilanngullugit ilinniagaqaqqinnissamut imaluunniit allatut piginnaasaqarnerulernissamut pisariaqartitsisoqarnerata isummerfigineqarnera. Pisortaqatigiinnik nalilersuinissamut aalajangiinissamut tunngavissat aalajangersarneqarnerat.
- m. Suliffeqarfimmi namminermi kukkunersiuinermik pisariaqartitsisoqarsinnaaneranik naliliineq.
- n. Kukkunersiuinermut ataatsimiititaliamik, toqqaasussanik aamma akissarsiarititat pillugit ataatsimiititaliamik kiisalu compliance pillugu ataatsimiititalimik pilersitsineq.
- o. Siulersuisunut ileqqoreqqusat aamma suleriaasissaq ingerlaavartumik Namminersorlutik Oqartussat suliffeqarfinni Namminersorlutik Oqartussat pigisaanni suliffeqarfimmik pitsaasumik aqutsineq pillugu maleruagassiaa tunngavigalugit nutarterneqartarnissaannik nakkutiginninneq, aamma Namminersorlutik Oqartussat aktianik piginnittut inassuteqaatai malinneqarnersut imaluunniit malinneqannginersut pillugit nalunaaruteqartarneq.

§ 4

4.1 Ataatsimiinnerni aqutsineq

Siulittaasoq siulersuisut ataatsimiinnerini aqutsisuusassaaq.

4.2 Aalajangersaasinnaassuseqarneq

Siulersuisut aalajangersaasinnaassuseqarput siulersuisuni ilaasortaasut affaat sinnerlugit najuuppata, taakkununga ilaalluni siulittaasoq.

4.3 Taasinermi maleruagassat

Taasinerni suliaq sunaluunniit aalajangersarneqartarpoq amerlanerussuteqarnikkut. Taasisut amerlaqatigiinneratigut siulittaasup taasina aalajangiisuusarpoq.

4.4 Peqataasinnaannginneq

Siulersuisuni ilaasorta, sinniisussa imaluunniit pisorta peqataasinnaanngilaq, ingerlatsiviup aamma nammineq akunnermini isumaqatigiissutinut apeqqutit suliarineqartillugit, imaluunniit eqqartuussisunut suliassanngortinneqartut namminerminut tunngasunut, imaluunniit ingerlatsiviup aamma inuup allap isumaqatigiissutissaat pillugit imaluunniit inummut allamut eqqartuussisunut suliassanngortinneqartut pillugit, nammineq tamatumunnga tunngatillugu annertuumik soqutigisaqaruni taamaattoqarneralu ingerlatsivimmut assortuuttuusinnaappat.

Siulersuisut akuersissutigissavaat isumaqatigiissutit siulersuisut, sinniisussat imaluunniit pisortat aamma ingerlatsiviup akornanni, taamatuttaaq ingerlatsiviup aamma inuup allap akornanni isumaqatigiissutit, tassunga atatillugu siulersuisunut ilaasorta, sinniisussa imaluunniit pisorta annertuumik soqutigisaqarpat tamannalu ingerlatsivimmut assortuuttuusinnaappat.

Qaqutigoortumik siulersuisuni ilaasorta ingerlatsiviup suliassaataanik neqerooruteqarniarpat, taava tamanna ingerlanneqassaaq tamanut suliariumannittussarsiuussisarnermi ileqqut aqqutigalugit.

4.5 Sinniisussat

Siulersuisuni ilaasorta sulisut qinigaat sivisuumik peqataasinnaanngippat napparsimaneq, aallarsimaneq imaluunniit allamik peqquteqartumik, taava pineqartup suliassai siulersuisuni ilaasortatut sinniisussaani ingerlanneqassapput. Taamaattorli sivikikkaluartumik peqataasinnaannginnerani sinniisussa immikkut ittumik aggersarneqarsinnaavoq, tamanna siulersuisut aalajangersaasinnaaneranut pisariaqartinneqarpat.

Siulersuisunut ilaasortanut aalajangersakkat taakku sinniisussaannut tamatumunnga pissuseqataasoq atuuppoq.

4.6 Pisortaqtigiit pisinnaatitaapput aamma pisussaataitaapput siulersuisut ataatsimiinnerini peqataassallutik aamma oqaaseqartassallutik.

Taamaattorli siulersuisut aalajangersinnaapput pisuni ataasiakkaani aalajangersassallugu pisortaqatigiit siulersuisut ataatsimiinneranni najuutinnginnissaannik.

§ 5

5.1 Siulersuisut allattaavissuat

Siulittaasup isumagissavaa siulersuisut ataatsimiinnerisa aamma aalajangersaanerisa allattaavissuarnut allattorneqarnissaat. Allattaavissuarmut allattukkani danskit oqaasii atorneqassapput.

5.2 Allattaavissuup imarisai

a) siulersuisut allattaavissuani protokollatinut tamanut ilanngunneqartassapput:

b) ataatsimiinnerup ingerlanneqarnerani piffissaq aamma sumiiffik

c) siulersuisuni ilaasortat imaluunniit allat peqataasimasut kikkuneri aamma ataatsimiinnermik kina aqutsisuusimanersoq

d) ullormut oqaluuserisassat suut saqqummiunneqarsimanersut

e) isumaqatigiinniarnit aamma aalajangersaanerit suut ingerlanneqarsimanerisa imaqarniliornerat

f) siulersuisut tulliani ataatsimiinnissaat qaqugu aamma sumi ingerlanneqassanersoq

g) allattaavissuarnut allattaasutut kina ingerlatsisuusimanersoq

5.3 Siulersuisuni ilaasortap imaluunniit pisortap, siulersuisut aalajangersaaneranut isumaqataangitsup, pisinnaatitaaffigaa isummami allattaavissuarnut allanneqarnissaa.

5.4 Ataatsimiinnermit imaqarniliaq siulittaasumut akuersissutigisassanngorlugu ingerlatinneqartassaaq, imaqarniliap siulersuisunut ilaasortanut aamma pisortaqatigiinnut taanna peqataasimappat nassiunneqannginnerani.

5.5 Siulersuisunut ilaasortaq imaluunniit pisortaqatigiit imaqarniliamut pingaaruteqartunik akerliussuteqarunik tamanna allaganngorlugu

nalunaarutigissavaat tigusinnerminnit kingusinnerpaamik sapaatit akunneri marluk qaangiutsinnagit.

- 5.6 Siulersuisut allattaavissuat siulersuisuni ilaasortanit inaarutaasumik akuersissutigineqassaaq aamma atsiorneqarluni siulersuisut ataatsimiinneranni tulliuttumi siullermi. Siulersuisunut ilaasortat ataatsimiinnermi imaqarniliorneqarsimasumik peqataasimangitsut, allattaavissuarmi nalunaassavaat imaqarniliaq atuarsimallugu.

§ 6

- 6.1 Siulersuisuni siulittaasoq

Siulersuisut siulittaasuata siulersuisunut suliffeqarfiup avataanut aamma suliffeqarfimmi namminermi sinniisuuvoq. Siulersuisut siulittaasuata piumasarineqartut, inatsisit, ingerlatsiviup maleruaqqusai aamma suleriaasissaq manna tunngavigalugu malinneqarnissaat nakkutigissavaa. Siulersuisut ataatsimiinnerini tamani siulittaasup siulersuisunut ilaasortat sinnerinut ilisimatitsissutigisassavai pissutsit ingerlatsivimmut pingaarutilimmik sunniuteqarsinnaasut, tassa siulersuisut siulittaasuata ilisimalersimasani ataatsimiinnerup kingulliup ingerlanneqarnerata kingornatigut.

- 6.2 Siulersuisut siulittaasuata siulersuisut sinnerlugit siulersuisut aamma pisortaqatigiit akornanni ingerlaavartumik attaveqatigiinneq isumagissavaa.

- 6.3 Siulersuisut aalajangersaaneri ingerlatsivimmut ingerlateqqinneqartassapput siulittaasup pisortaqatigiinnut saaffiginninneratigut. Taamaattumik ingerlatsiviup sulisuisa sinneri siulersuisunit ilaasortamit saaffigineqarsinnaanngillat imaluunniit ilitsersorneqarsinnaanngillat, tamanna ataatsimiititaliani qaqugukkulluunniit atuuttuni isumaqatigiissutigineqarsimangippat.

- 6.4 Siulittaasoq peqanngitsillugu sunut tamanut tunngatillugu siulittaasup tulliata siulittaasoq sinnertarpaa. Taamaattorli tamatumani pineqanngilaq atsiorsinnaatitaaneq, tak. ileqqoreqqusani § 10.

- 6.5 Siulersuisut siulittaasuata qulakkiissavaa aktiaatilimmut aamma soqutigisaqartunut allanut pingaarutilinnut pitsaasumik attaveqatigiinnissaq.

- 6.6 Siulersuisut siulittaasuata akisussaaffigaa siulersuisunik aamma pisortaqatigiinnik nalilersuinissap ingerlanneqarnissaa aktiaatilimmullu saqqummiunneqarnissaa.

§ 7

7.1 Siulersuisut nipangiussisussaataanerat

Paasissutissat aamma uppernarsaasersuutitut atortussat siulersuisuni ilaasortap imaluunniit sinniisussap ingerlatsivimmit imaluunniit siulersuisuni ilaasortamit allamit pissarsiarisai isertuunneqartussatut isigineqassapput. Ilaasortat aamma sinniisussat siulersuisuni ilaasortatut imaluunniit siulersuinut sinniisussatut atuunnerminni ilisimalikkaminnut tunngatillugu nipangiussisussaataapput.

Nipangiussisussaataaneq niuernermi imaluunniit ingerlatsinermi isertuussassanut tunngasuuginnanngilaq, kisianni siulersuisut ataatsimiinnerini aqqusaarneqartunut tamanut tunngasuuvoq, imaangippat pissutsit pineqarpata taakku siulersuisut aalajangersaanerisa kingorna, inatsisitigut maleruagassat imaluunniit immikkut inatsisinik atuutsitsinermut tunngatillugu tamanut saqqummiunneqarsinnaasut.

Siulersuisuni ilaasortaq aamma sinniisussaq paasissutissat aamma atortussat tigusimasamik allanut tunniunneqannginnissaannut imaluunniit allanut siulersuisunut akuunngitsunut pissarsiaritinneqannginnissaannut akisussaassuseqarpoq.

7.2 Utertitsinissamut pisussaaffik

Siulersuisunut ilaasortaq imaluunniit sinniisussaq tunuarpat taava siulersuisuni ilaasortatut atuunnerminnut atatillugu atortussat aammattaq taakku aappiussatut assilineri, kopiivi il.il. tigummisai tamarmik piuneerutsinneqassapput imaluunniit ingerlatsivimmut utertinneqarlutik. Atortussat piuneerutsinneqassanersut imaluunniit utertinneqassanersut pisumit pisumut immikkut siulersuisut siulittaasuallu isumaqatigiissutigineqartassaaq.

Siulersuisut imaluunniit siulersuisuni ilaasortaq tunuarsimasoq eqqartuussivimmut suliassanngortinneqassagaluarpat, taava pineqartoq piffissami qinigaaffigisamini atortussanik tunineqarnissaminut pisinnaatitaavoq. Ilaasortatut tunuarsimasoq atortussanik tunineqartoq nipangiussisussaataaassaaq.

Siulersuisuni ilaasortaq imaluunniit sinniisussaq toqukkut qimaguppat utertitsinissamut pisussaaffik tamanna kingornussisussaasa tamanna pisussaaffigaat.

7.3 Tusagassiutinut il.il. oqaaseqarneq

Siulersuisunut ilaasortaq pissutsit ingerlatsivimmut tunngasut pillugit nutaarsiassa qarfinnut oqaaseqaateqarsinnaavoq imaluunniit kikkunnut tamanut saaffiginnissinnaavoq aatsaat siulittaasumit akuerineqaqqaarnermigut.

§ 8

- 8.1 Immikkut ittumik pisoqartillugu suliffeqarfik sinnerlugu pisinnaaneq
- 8.2 Siulersuisut suliassani tamani tunngaviusumik imaluunniit annertuumik kinguneqartussanut tunngatillugu oqaluuserinnissapput aamma aalajangersaassapput. Taamaattorli pisortaqatigiit siulittaasumit imaluunniit peqanngitsillugu siulittaasup tullia peqatigalugu, taava sulianut taamatut ittunut tunngatillugu pisariaqartunik aalajangersaasinnaapput ingerlatsiviup ingerlatsineranut malunnaatilimmik akornusiinissaa pissutigalugu siulersuisut aalajangersaanissaat utaqqineqarsinnaanngippat. Taamaattoqartillugu siulersuisut sapinngisamik piaartumik aalajangersaanerit taamaattut pillugit ilisimatinneqassapput.
- 8.3 Immikkut illuinnartunik pisoqartillugu apeqqutitut ataasiakkaanut tunngatillugu siulersuisut, siulersuisuni ilaasortanut ataasiakkaanut imaluunniit siulersuisunut ilaasortanut ataatsimut imaluunniit arlaqartunut, sammisaqartitsisinnaapput.

§ 9

- 9.1 Ingerlatsivimmi aqutsineq
- Siulersuisut aamma pisortaqatigiit tassaapput ingerlatsivimmut tunngasunik aqutsisut. Ulluinnarni ingerlatsivimmi aqutsineq pisortaqatigiinnit ingerlanneqarpoq, taakkulu maleruagassat aamma inassuteqaatit siulersuisunit imminnut tunniunneqarsimasut malissavaat. Ulluinnarni aqutsinermut ilaatinneqanngillat aalajangersaanerit ingerlatsivimmi pissutsinut tunngatillugu nalinginnaanngitsut imaluunniit annertooujussuarmik sunniuteqartut.
- 9.1.1 Siulersuisut qulakkiissavaat akisussaassuseqarnermut, pilersaarusiornermut, malinnaaffiginninnermut aammattaaq nalorninartunik aqutsinermut maleruagassat erseqqissut. Siulersuisut pisortaqatigiinnik nakkutiginnittuupput aamma tamatumunnga tunngatillugu maleruagassiorsinnaapput, tak. imm. 9.2. Siulersuisut qullersaasutut aamma siunissamat tunngatillugu ingerlatsivimmik

aqutsineq isumagisaraat. Siulersuisut ingerlatsiviup siunissamut pilersaarutini anguniagai pisortaqatigiit suleqatigalugit aamma aktiaatilik oqaloqatigalugu aalajangersarpaat aamma qulakkeerpaat, piunasaqaatit aamma aningaasat pisariaqartut anguniagassanik taakkuninnga angusaqarnissamut qulakkiissavaat, tassani pineqarput aningaasaliissuteqarnerit taamatullu piginnaasatigut isumalluutit aamma ingerlatsiviup ingerlatsinerani isumannaatsumik aqqissuussaaneq qulakkeerlugu.

9.2 Malittarisassat

Siulersuisut pisortaqatigiinnut malittarisassaliorsinnaapput tassani erseqqinnerusumik nalunaarneqassallutik ingerlatsivimmi suleriaasissaq qanoq ittuussanersoq, tamatumunnga ilanngullugit qanoq annertutigisumik pisortaqatigiit suliassanik aamma aalajangersaanernik ingerlatsiviup sulisuinut tunniussaqaarsinnaanersut. Taamatuttaaq siulersuisut peqqussutigissavaat pisortaqatigiit maleruagassanik suliaqarnissaat tamatumuuna qulakkeerpeqassalluni, aktieselskabinut naalagaaffiup pigisaanut ingerlatsivinnut inatsimmi aammattaaq ukiumoortumik naatsorsuusiornermut inatsimmi immikkut aalajangersakkat, eqqortinneqarnissaat. Malittarisassat sularineqarsinnaapput tunaartarisassalerlugit, siulittaasup pisortaqatigiinnik oqaloqateqartarnera, akuersissuteqartarnermut killiliussat kiisalu tamatuminnga suliakkiissuteqartarneq siulittaasup, siulersuisut, pisortaqatigiinnilu ilaasortat aamma aqutsisoqatigiit akornanni paaseqatigiissutigineqarneratigut.

9.3 Nakkutilliinissamut pisussaaffik

Siulersuisut isummerfigissavaat sukkulluunniit ingerlatsiviup ingerlatsineranut naleqqiussilluni ingerlatsiviup aningaasaqarnikkut sillimmateqarnera. Siulersuisut ingerlatsivimmik ingerlatsinermik nakkutilliisuussapput aamma nakkutigissavaat isumannaatsumik aqunneqarnera ingerlatsivimmi ileqqoreqqusat, ingerlatsiviit pillugit inatsit aamma inatsisit allat ingerlatsivimmut pingaaruteqarsinnaasut malillugit.

Siulersuisut nakkutigissavaat naatsorsuutitut allattuineramik aamma pisuussutinik ingerlatsinermik, ingerlatsivimmi pissutsinut naleqquttumik naammaginantumillu misissuisoqartarnera.

Tamakku saniatigut siulersuisut ingerlaavartumik misissortassavaat aalajangersaanerit siulersuisunit aalajangersarneqarsimasut piviusunngortinneqartarnerat, aamma suleriaatsit kiisalu maleruagassat

ingerlatsinermut tunngasut siulersuisunit aalajangersarneqarsimasut malinneqarnersut.

- 9.4 Siulersuisut pisussaaffigaat paasissutissanik pissarsiornissaq tassa nammineq suliassaminnik naammassinninnissaminnut pisariaqartitaminnik. Tamatuma saniatigut siulersuisut tamanut peqqussutigisinnaavaat namminneq suliassaminnik naammassinninnissaminnut paasissutissat pisariaqartitamik imminnut ilisimatitsissutigineqartarnissaat.

§ 10

- 10.1 Aktiaatilinnut ilisimatitsissuteqartarneq

Siulersuisut aktiaatilimmut ilisimatitsissutigisassavaat makku naatsorsuutit inernerisa ineriartornerannut naatsorsuutigisat aamma ineriartornerit piviusunngortinneqartut imaluunniit allannguutit pingaaruteqartut, taakku imatut isigineqarsinnaappata ingerlatsiviup aningaasaqarneranut malunnaatilimmik sunniuteqarsinnaanerit. Taamatuttaaq siulersuisut aktiaatilimmut ilisimatitsissutigisassavaat allannguutit piviusunngortut imaluunniit allannguutit naatsorsuutigisat ingerlatsivimmut nalorninartutut tunngasuuteqartuusut.

Siulersuisut siulittaasoq aqqutigalugu aktiaatilimmut saqqummiutissavai paasissutissat ingerlatsivimmut tunngasut aamma taakku siunissamut pilersaarutinut tunngatillugu sunniuteqarsinnaappata imaluunniit annertuumik kinguneqassappata, inuiaqatigiinnut imaluunniit inuiaqatigiinni aningaasaqarnermut kinguneqarlutik.

§ 11

- 11.1 Ukiumoortumik nalunaarusiap suliarineqartarnera aamma akuersissutigineqartarnera

Pisortaqatigiit ukiumoortumik nalunaarusiamut aamma ukiumoortumik nalunaarummut siunnersuusiussapput tamatumunngalu ilanngullugu nakkutigisavaat taakku ileqqoreqqusani aamma inatsisini aalajangersarneqarsimasut malillugit ilusilerneqarnissaat. Tamatuma kingorna ukiumoortumik nalunaarusiaq aamma kukkunersuisut oqaaseqaatissamut siunnersuutaat siulersuisunut saqqummiunneqassapput akuersissutigisassanngorlugit.

Ukiumoortumik naatsorsuutit siulittaasup aamma pisortaqatigiit iliuseqarnerisigut siulersuisuni ilaasortanut ataasiakkaanut siulersuisut ataatsimiinnissaat ullunik 14-inik sioqqullugu nassiunneqassaaq, ataatsimiinnermi tassani naatsorsuutit inaarutaasumik oqaluuserineqassapput taamaattorli kingusinnerpaamik ileqquusumik ataatsimeersuarnissaq sapaatit akunnerinik pingasunik sioqqullugu.

Siulersuisut ukiumoortumik naatsorsuutitut siunnersuut pisortaqatigiinnit suliarineqartoq aammattaaq kukkuneruisut oqaaseqaammut siunnersuutaat oqaluuserissavaat, tamatumunngalu ilanngullugu nakkutigissavaat ukiumoortumik naatsorsuutit inatsisini, ileqqoreqqusani aamma naatsorsuusioriaatsimi ileqqorissaarnissamut piumasaqaatit malillugit suliarineqarsimanissaat.

Tamatuma kingorna siulersuisut ukiumoortumik nalunaarusiaq akuersissutigisinnaavaat kiisalu naatsorsuutitigut angusat sumut atornerarnissaannut tunngatillugu aalajangersaallutik.

11.2 Ukiup affaanut nalunaarusiaq

Ingerlatsivimmi pisortaqatigiit ukiup qiteqqunneri tamaasa siulersuisunut ukiup affaanut nalunaarusiaq saqqummiuttassavaat, tassani ingerlatsiviup ukiup qaammataani arfinilinni siullerni naatsorsuutai saqqummersinneqassapput. Ukiup affaanut nalunaarusiaq ukiumoortumik nalunaarusiamik suliaqartarnermut piumasaqaatit tunngaviusut tunngavigalugit suliarineqassaaq.

§ 12

12.1 Kukkuersiuisut

Ingerlatsiviup kukkuersiuisui siulersuisut ukiumoortumik naatsorsuutit oqaluuseralugit ataatsimiinneranni peqataassapput.

Siulersuisuni ilaasortaq aammattaaq pisuni allani pisinnaatitaavoq noqqaassutigisinnaallugu kukkuersiuisut siulersuisut ataatsimiinneranni najuunnissaat.

12.2 Kukkuersiuisut oqaaseqaataat

Kukkuersiuisut oqaaseqaataat suliarineqarsimasoq siulersuisut ataatsimiinnerini tamani tiguneqarsinnaassaaq, kukkuersiuisut tamatumunnga ilassuteqarsimappata.

Kukkuersiuisut oqaaseqaataat siulersuisuni ilaasortanit tamanit atsiorneqartassapput, taamaaliornermikkullu uppernarsarpaat oqaaseqaatini allassimasunik ilisimasaqarnertik.

12.3 Siulersuisut aamma kukkuersiuisut allaganngorlugu isumaqatigiissutigissavaat kukkuersiunerup qanoq annertutiginissaa.

-oo0oo.

Taamaalilluni kingullermik allanngortinneqarpoq aamma akuersissutigineqarpoq siulersuisut ataatsimiinneranni, ulloq februaarip 21-ani 2006 aamma siulersuisut ataatsimiinneranni, ulloq septembarip pingajuani 2013 aamma siulersuisut ataatsimiinneranni, ulloq marsip pingajuani 2022.

Siulersuisut:

Siulittaasoq, Ulrik Blidorf	Siulittaasup tullia, Erik Østergaard	Julia Olsen
Minannguaq Zeeb	Erik Sivertsen	Eydun Simonsen
Laust L. Vestergaard	Jens Peter Berthelsen	Heidrún Jónsdóttir

